

**Leetal ya éyaañ ya eyya Sañ
naakiice ya
1 Sañ
Waah wa weeyem wa ti leetal
eyye**

Aluu pakanam keeyemaam ka ti káasiitan, inci kicanaa.

Añe leetal ya éyaañ ya eti Sañ. Ayme akiice leetal eyye? Akiica ya asokut akina ayem ayme, pale ti káawincinool, ínhiini unaa nii, eekiice ya leetal eyye, akina ayem Sañ, akee ti pinapana pa pakati Yéesu. Sepete añiinoo.

Teyme naakiice leetal eyye? Leetal eyye ta neekiicee ta, hak máamun sitiil áwii ésupak (40) puwant sitiil áwii ésupak nin ñaasuwan (50) pamuusal eket ya eti Yéesu Krista.

Weyme uwune leetal eyye neekiicee? Ti oom caanak, taakaataako pikalañana keeneetaat pánipani keeyeniye kaalincan kéeyinane ka ti Yéesu. Intaako pakakee keeyeniye lombo hífulu ti káyinan ka. Tempo Sañ naakiice leetal eyye kati acoonanool pakan paka kati kámeyi ayme ayem éeyinane pánipani nin ayme ayem akalañana pánipani.

Sañ naahintan waah úhaaciil ewwa efikasincan tewwo kati kámeyi man añe éeyinane pánipani ati Yéesu nin foton akalañana pánipani.

1. Fo áyinanaayinan nii, Yéesu Krista ayem Añii ya ati Pútuun pa éeyenoonii ya an? Sanj naasok nii: *“an óo an eesoke nii pánipani Yéesu Krista ákeyyookey naayeno an, oom an ataakaataak Kunuu ka keenape ka kéefulii ka ti Pútuun pa. Pale an óo an eepooke nii Yéesu ákeyyookey naayeno an, oom an ataakut Kunuu ka keenape ka kéefulii ka ti Pútuun pa.”* (4:2-3)

2. Fo álafilafi pakanoo ti káýinan? Eehe náayisane nii: *“Uláfooliyaa, kaatuko pálafi ti Pútuun pa náafulii. An óo an éelafiye pakan, oom an Pútuun pa pupukoo, náameyi po.”* (4:7-8) Asok: *“An óo an eesoke nii álafilafi Pútuun pa, háati fo naanat anoo ti káýinan, oom an nincaama.”* (4:20)

3. Fo átuulaatuul hilim ha hiti Pútuun pa? Asok: *“An óo an eesoke nii, ámeyimeyi Pútuun pa, apan átuulut hilim etempo, oom an nincaama, ántuñ tooñaa ya eneetaat teyoo.”* (2:4)

Alaapalaka ti káasiitan ka kitaaluu, álimaati Pútuun pa púwiiniyan kunuu unaa mpípankin saan unaa kati úyiniyaa kasayan hilim etempo. Ti caacaw ca citi Yéesu Krista. Amíini.

Hilim ha hiti elon ya

^I Unii unka ti káatuunan aluu kiti an a ee-taakiye ya kápiliñ ti púcook pa, aña núusiye ya nuucukoo niñ ñíkin unii, aña nuusincane ya núulikoo niñ sipees unii. Akina ayem Hilim ha hiti elon ya.

^{II} Aña eeyem ya elon ya náafulii; nuucukoo núuyemi keetantake ka pakateyoo, fiye núutuunan aluu kiti aña eeyem ya elon ya

eepayantoo ya. Ayenaayeno ninj Paapaa ya náafulii toonii.

III Anja nuucuke ya núusi, núuyemi aluu ti káatuunan kiteyoo, ancuk aluu lombo niyenyaa ninj unii pakoonool samat nii fa unii nuuyem fa pakoonool ninj Paapaa ya ninj Añiino Yéesu Krista.

IV Ukiicaakiic eehe ancuk utaakaa pásuuma pántoon.

Ecaañ ya eti Pútuun pa

V Anje ayem ekoonjan ya eyya Yéesu Krista naawufane ya unii, núuyemi yo aluu ti káatuunan: Pútuun pa ecaañ, énimaa etaakiit tempo cántum.

VI Ninj usokaa nii unaa pakoonool ninj Pútuun pa apan núuyemiyaa ti elonj eti ñáanim, kincaam nuuyaakeyaa ántun uneetaataa ti elonj eti tooñaa.

VII Pale ninj unaa unapaa ti ecaañ ya, samat nii pikina fa mpiyem fa ti ecaañ ya, nuuyenyaa pakoonool, hísim ha hiti Yéesu, Añii etempo, nihikuulan unaa ti umuuyen óo umuuyen.

VIII Ninj unaa usokaa nii utaakutaa kaamuuyen, kincaakool fanj unaa nuuyaakeyaa, apan tooñaa ya eneetaat ti unaa.

IX Pale Pútuun pa peecoonoole, púfulantoo ti hilim etempo, ninj uwatanooliyaa umuuyen wa utuunaa nuulumaa po kaaponket, efipuponket umuuyen wa utuunaa mpukuulan unaa ti heenaput óo heenaput.

X Ninj usokaa nii umuuyenutaa, hisoku nu-
uyaakeyaa nii Pútuun pa nincaama, hilim
etempo hineetaat ti unaa.

II

Yéesu Krista ayankanana ya unaa

I Epuukam, inci oopa ti hikiicu aluu eehe
ancuk timpí nimuuyen. Pale ninj an amuuye-
naa, utaakaataak ayankanana aña nasiinjo unaa
hátikin Paapaa ya, akina ayem Yéesu Krista,
eecoonoole ya.

II Akina awaaseene elonjoo ancuk umuuyen wa
utuunaa kati uponketee. Neetaat umuuyen wa
utuunaa lamma pale focaa lombo umuuyen wa
uti púlunta pa púloonj.

III Ehe fa éfuumeyiyaa nii úmeyiyaameyi
Pútuun pa: ninj útuulaa kilim etempo
keesiinane ka.

IV An óo an eesoke nii, ámeyimeyi Pútuun pa,
apan átuulut hilim etempo, oom an nincaama,
te tooña ya eneetaat teyoo.

V Pale kéetuule ka hilim ha hiti Pútuun pa,
káyisanaayisan pánipani fa nkálafiye po fa
pántoon. Fiyuu éfuumeyiyaa nii unaa unka
tempo.

VI An óo an eesoke nii oopa ti elonj ti Pútuun pa,
oom an añañaa elonj samat nii fa Yéesu Krista
naalonne fa.

VII Pákawiyam ti káyinan, inci neetaat aluu ti
hikiicu hilim héeyeeni pale heemaamane, eeha
innitaake ha kápilinj ti púcook pa. Hilim ha

heemaamane eehe hiyem ekoonŋan eyya ínisiye ya.

VIII Pale hilim eeha inci iyyem ha aluu fiye ti hikiicu, héeyeeni lombo; tooñaa eteeho eckeecuk ti Yéesu Krista niŋ lombo ti aluu, kamma énimaaŋ ya neeyem ti himuusu, ecaŋ ya eti pánipani ya néeyemi fiye ti hicaaŋu.

IX An óo an eesoke oopa ti ecaŋ ya, háati fo naanat anoo ti káyinan, oom an aloŋaa ti énimaaŋ.

X An óo an éelafiye anoo ti káyinan, oom an oopa ti eloŋ ti ecaŋ ya, waah uneetaat teyoo ewwa efuuwun naanow ti kaamuuyen.*

XI Pale an óo an eenate anoo ti káyinan, oom an oopa ti énimaaŋ náayemi ti hinapu ti énimaaŋ, ámiit peyme naayem ti pikaayu kamma énimaaŋ ya néefuumanoo.

XII Aluu epuukam, inci oopa ti hikiicu aluu kamma umuuyen wa utaalu nuuponketee pínapii ti caacaw ca citi Yéesu Krista.

XIII Aluu ñíhampaatiin ña, inci oopa ti hikiicu aluu kamma innimeya aŋa eetaakiye ya kápiliŋ ti púcook pa.

Aluu uhiineen wa, inci oopa ti hikiicu aluu kamma inniheeke Seetaani ya.

XIV Aluu epuuk ya, inci kiicaa aluu kamma innimeya Paapaa ya.

Aluu ñíhampaatiin ña, inci kiicaa aluu

* **II:X 2:10** Niŋ ekena tom: “waah uneetaat teyoo ewwa efuuwun akee naanow ti kaamuuyen.”

kamma innimeya aṇa eetaakiye ya kápiliṇ ti
púcook pa.

Aluu uhiineen wa, inci kiicaa aluu
kamma innitaake sempe, hilim ha hiti
Pútuun pa nihikin ti aluu,
inniheek Seetaani ya.

Kákupanan kéelafiye ka púlunta pa

^{XV} Timpi nílaṇi púlunta pa niṇ fotom waah óo
waah weeyem ti púlunta pa. An óo an éelafiye
púlunta pa, pálaṇi pa piti Paapaa ya pineetaat
teyoo.

^{XVI} Kaatuko heeyem ha ti púlunta pa, hikina
hiyem: kunuu ka keenaput ka kiti pakan paka;
kaasiinjan níkin ti waah uti an; niṇ kalitan pisaña
kamma hitaaku. Eehuu púloon hífuliyoot ti
Paapaa ya, pale ti púlunta pa.

^{XVII} Apan púlunta pa niṇ waah óo waah
weeyem tempo ewwa pakan paka nkálaakan
tewwo, uwwa ti ékey hipayu, pale an óo an
éehine eeḥa Pútuun pa mpílaṇiye ha afaalon fo
cancowiyaaw.

Akamool a ati Eenucee ya ati Pútuun pa

^{XVIII} Epuukam, waati ya ekelan ya écoliyoocol.
Nísiyaasi nii akamool a ati Eenucee ya oopa ti
ékey, apan fiye hícumṇ pikamool Eenucee ya
kákeyyookey. Fiyuu nuumeyaa nii waati ya
ekelan ya écoliyoocol.

^{XIX} Kakatanaakatan unaa, pale taapala kayeno
niṇ unaa. Kaatuko niṇ kayenaayeno niṇ unaa,
anti katowo niṇ unaa, pale pikaayu pa piteyii
píyisane nii an teyii aneetaat niṇ unaa.

XX Pale aluu nitaakaataak Kunuu ka keenape ka enka Eenucee ya naawufane ka aluu, fiyuu aluu púloonj innimeya tooña ya.

XXI Inci neetaat aluu ti hikiicu kamma ínnimiit tooña ya, pale kamma innimeya tooña ya apan ínnimeyi lombo nii kincaam ayinaat éfulii ti tooña ya.

XXII Ayme ayem nincaama na? Akina ayem éelaacine ya nii Yéesu ayem Eenucee ya. Ehe akamool a ati Eenucee ya: aña éelaacine ya Paapaa ya niŋ Añii ya.

XXIII An óo an éelaacine Añii ya ataakut lombo Paapaa ya. Pale an óo an eesayane Añii ya hátikin pakan paka ataakaataak lombo Paapaa ya.

XXIV Ooto aluu niñaŋaa himanku ti saan aluu kilim enka ínnisiye ka kápilij ti púcook pa. Niŋ kilim enka ínnisiye ka kápilij ti púcook pa kutowiyaa ti saan aluu, efinitowo lombo ti Añii ya niŋ Paapaa ya.

XXV Ehe eeha Eenucee ya náayinanane ha unaa nii afaawufan ho unaa: hikina hiyem, elonj ya eepayantoo ya.

XXVI Inci oopa ti hikiicu enke púkupanen aluu kiti kéelaŋiye ka aluu kaalincan.

XXVII Pale aluu, Eenucee ya awufanaawufan aluu Kunuu ka Keenape ka. Páawoo Kunuuwoo kiyem ti aluu, nisoolahut an apikalaŋan aluu. Kaatuko Kunuu ka nkikalaŋan aluu waah óo waah, ántuŋ eeha nkikalaŋane ha aluu hiti tooña, hineetaat hiti kincaam. Ekina ewune niñaŋaa putowo ti Eenucee ya samat nii fa Kunuu ka nkikalaŋane fa aluu.

Epuuk Pútuun pa

XXVIII Fiye, epuukam, nitowo ti Eenucee ya, ancuk niŋ áñoohoniyoo nuutaakaa cíki apan etuusuuwaa hátikinoo ti éñoohonii ya eteyoo.

XXIX Páawoo úmeyiyaameyi nii Eenucee ya eecoonoole, núumeyiyaa lompo nii payenka nkáhin ka heecoonoole, poko Pútuun pa mpupuke.

III

I Nisincan fa Paapaa ya náalafiye fa unaa meemak: álafilafi unaa fo nuuyonkalee epuuk Pútuun! Apan eehuu tooŋaa, unaa epuuk etempo. Pakati púlunta pa kámiit unaa, kaatuko kámiit Paapaa ya.

II Aluu pákawiyam ti káyinan, fiye unaa epuuk Pútuun pa; fa efuucukaa fa úmiitaa fala. Pale úmeyiyaameyi nii, niŋ Yéesu Krista áñoohoniyoo, efuucukaa nii akina, kaatuko efuucukoo samat nii fa naayem fa.

III An óo an eetaake cíki eyye ti Yéesu Krista afaakuulane samat nii fa Yéesu Krista naakuule fa.

IV Niŋ an amuuyenaa, káataakoolan hilim ha heesiŋanee ha hiti Pútuun naayaake, kaatuko kaamuuyen ayem káataakoolan hilim ha heesiŋanee ha.

V Pale nímeyimeyi nii Yéesu Krista ákeyyookey kati áfulan umuuyen wa utuunaa. Akina ataakut kaamuuyen.

VI Ekina ewune an óo an eelone teyoo atatowo ti kaamuuyen. Pale an óo an eetowiye ti kaamuuyen acukutoo ámiitoo.

VII Epuukam, timpi nikat an apilincan aluu. An éehine heecoonoole, oom an eecoonoole samat nii fa Yéesu Krista naacoonoole fa.

VIII An eetowiye ti kaamuuyen, Seetaani ya eyem áhampaatiin a ateyoo, kamma Seetaani ya neetowiye ti kaamuuyen kápiliŋ ti púcook pa. Heewune ha Añii ya ati Pútuun pa náakey, hikina hiyem káapucalool páhin pa piti Seetaani ya.

IX An óo an aŋa Pútuun pa mpupuke, atowiyan-too ti kaamuuyen, kamma eloŋ ya eti Pútuun pa neeyem teyoo. Ayinaat putowo ti kaamuuyen kamma Pútuun pa mpupukoo.

X Ehe fa éfuukatinoolaa epuuk ya pakati Pútuun pa niŋ epuuk ya pakati Seetaani ya: an óo an éehinantoo heecoonoole niŋ fotom éelafiit pakanoo ti káyinan, oom an aneetaat añii ati Pútuun pa.

Pálafooli

XI Ekoonan eyye ínnisiye kápiliŋ ti púcook pa nii, uñaŋaa pálafooli.

XII Uñaŋutaa hicuku samat nii Kayin eemuke ya atuwoo. Akina ati Seetaani ya. Weyme uwune naamukoo? Amukoomuk kamma páhinaloo mpinaput, apan atuwoo páhinaloo mpucoonool.

XIII Pakanam ti káyinan, timpi niŋaŋo niŋ pakati púlunta kanataa aluu.

XIV Uméyiyaameyi nii úfuliyaafuul ti eket úpukeyyaa ti eloŋ kamma núlafiyaan pakan unaa ti káyinan. An óo an eetaakut pálaŋi, ti eket natowo.

XV An óo an eenate anoo ti káyinan, akina amukala. Apan nímeyimeyi nii amukala ataakut teyoo eloŋ ya eepayantoo ya.

XVI Ehe fa nuukaakaayaa kameye weyme uyem pálafi: Yéesu Krista awufane eloŋoo kamma unaa. Unaa lompo uñaŋaa kawufan eloŋ unaa kamma pakan unaa ti káyinan.

XVII Niŋ an eetaake acukaa anoo ti káyinan eesoolahe kayankanan, naapookoo kayankanan, puume pálafi pa piti Pútuun pa éfipiyemi teyoo?

XVIII Epuukam, timpi úlafooliyaa niŋ putum lamma niŋ fotom ti pákupal pale ti pawenal niŋ ti tooña.

XIX Niŋ úlafooliyaa fiyuu, éfuumeyiyaa nii unaa pakati tooña ya, kunuu unaa inkipepan hátikin Pútuun pa.

XX Háati kunuu unaa nkunook unaa, Pútuun pa pihana kunuu unaa, mpímeyi waah óo waah.

XXI Pákawiyam ti káyinan, niŋ kunuu unaa kunookut unaa, efuutaakaa cíki hátikin Pútuun pa.

XXII Apan mpuwun unaa waah óo waah ewwa nuulumaa po, kamma núutuulaa kilim etempo keesiinane ka núuhinaa ee ha mpílaŋiye ha.

XXIII Ehe hilim etempo heesiinane ha: uñaŋaa káyinan ti caacaw ca citi Añii etempo, Yéesu Krista, núulafooliyaa lompo samat nii fa mpu-soke fa unaa.

XXIV Aña éetuule ya hilim ha hiti Pútuun pa afaakin tempo, pikina lompo mpikin teyoo. Antúŋ ehe fa éfuumeyiyaa nii pikinaakin ti unaa: éfuumeyiyaa ho pínapii ti Kunuu ka keenape ka enka mpuwufane ka unaa.

IV

Kunuu ka kiti pánipani niŋ kiti kincaam

^I Pákawiyam ti káyinan, timpi níyinan pakan paka púloon keesoke ka nii Kunuu ka keenape ka unka teyii, pale inniyoop tan óo tan nipicuk man kunuu enka nkataake ka, kéefulii ti Pútuun pa. Kaatuko hícump piyaamakoola keeneetaat pánipani kanakaanako ti púlunta pa.

^{II} Ehe fa innikaakaay fa kameye nii an ataakaa Kunuu ka keenape ka kiti Pútuun pa: an óo an eesoke nii pánipani Yéesu Krista ákeyyookey naayeno an, oom an ataakaataak Kunuu ka keenape ka kéefulii ka ti Pútuun pa.

^{III} Pale an óo an eepooke nii Yéesu ákeyyookey naayeno an, oom an ataakut Kunuu ka keenape ka kéefulii ka ti Pútuun pa. Kunuu enka naataake ka, kiti Akamool Eenucee ya, aña ínnisiye ya nii, añaŋaa ékey, apan fiye ákeyyookey ti púlunta pe.

^{IV} Epuukam, aluu pakati Pútuun pa, apan niheekaaheek piyaamakoola pa keeneetaat ka pánipani kamma kunuu ka kiti Pútuun pa keekine ka ti aluu nkihanje sempe Seetaani ya eeyem ya ti púlunta pe.

^V Poko pakati púlunta pe, ekina ewune nkákup samat nii pakati púlunta pe, apan pakati púlunta pe nkásiitanii.

^{VI} Unaa pakati Pútuun pa, an óo an eemeya Pútuun pa násiitansiitan unaa; pale an óo an eeneetaat ati Pútuun pa ásiitanantoo unaa. Fiyuu nuuyinaa kameye Kunuu ka keenape ka kiti tooŋaa ya niŋ kunuu ka kiti kincaam ka.

Pálafi pa piti Pútuun pa nin pálafooli pa piti unaa

VII Pákawiyam ti káyinan, úlafooliyaa, kaatuko pálafi ti Pútuun pa náafulii. An óo an éelafiye pakan, oom an Pútuun pa pupukoo, náameyi po.

VIII Pale an óo an éelafiit pakan ámiit Pútuun pa, kamma Pútuun pa mpiyem pálafi.

IX Ehe fa Pútuun pa mpíyisane fa unaa pálafi etempo: púpoñiyoopoñ añii etempo oonool a kónj ti púlunta empe, ancuk kati utaakaa elonj pínapii teyoo.

X Añe ayem pálafi: unaa tom úlafiyaa Pútuun pa, pale pikina pílafiye unaa mpúpoñii Añii etempo ancuk umuuyen wa utuunaa nuuponketee kamma naawaaseene elonjoo.

XI Pákawiyam ti káyinan, páawoo fiyuu Pútuun pa mpílafiye unaa, unaa lombo uñañaa pálafooli.

XII An ataapala acuk Pútuun pa, pale nin úlafooliyaa, Pútuun pa mpikin ti unaa mpíhin pálafooli pa piti unaa pipinakool tak nin piteetepo.

XIII Ehe fa éfuumeyiyaa fa nii unaa unka ukinaa tempo te pikina lombo mpikin ti unaa: puwufanaawufan unaa Kunuu etempo keenape ka.

XIV Unii ucukaacuk, núutuunan pakakee paka tan óo tan nii Paapaa ya ápoñiyoopoñ Añiinoo apiyeno Afakana ya ati púlunta pa.

XV An óo an éeyinane naasok nii Yéesu ayem Añii ya ati Pútuun pa, Pútuun pa efipikin teyoo, akina lombo naakin tempo.

XVI Núumeyiyaa pálaŋi empa Pútuun pa mpílaŋiye unaa, núuyinanaa ti oom pálaŋi.

Pútuun pa piyem pálaŋi; an óo an éelaŋiye pakan, akinaakin ti Pútuun pa, Pútuun pa lombo mpikin teyoo.

XVII Niŋ pálaŋi pa peeyem pa ti unaa pinakoolaa tak niŋ piti Pútuun pa, efuutaakaa cíki enfakat ti hinoom ha hiti kíiti ya, kamma pawenal unaa ti púlunta pe mpucuke samat nii piti Yéesu Krista pa.

XVIII Pálaŋi anapoolut niŋ ewatate. Pale pálaŋi peenakoole tak niŋ piti Pútuun pa mpiyaanyaan ewatate óo ewatate, kaatuko ewatate waah weenapoole niŋ kaasiŋanee ti pisiya. An óo an eewatata, pálaŋi pa piti Pútuun pa pútuuniit teyoo.

XIX Utaakaataak pálaŋi kamma Pútuun pa mpítikine pílaŋi unaa.

XX An óo an eesoke nii álaŋilaŋi Pútuun pa, apan naanat anoo ti káyinan, oom an nincaama. Kaatuko an óo an éelaŋiit anoo ti káyinan háati fa naacukoo fa, ayinaat pálaŋi Pútuun pa empa naacukut pa.

XXI Hilim ha heesiŋanee ha eehe Pútuun pa mpuwufane unaa, hisok: an óo an éelaŋiye Pútuun pa añaŋaa pálaŋi lombo anoo ti káyinan.

V

Káyinan ti Añii ya ati Pútuun pa

¹ An óo an éeyinane nii Yéesu ayem Eenucee ya, oom an añii Pútuun pa. An óo an lombo éelaŋiye paapaa ya, áfaalaŋi lombo añiino.

II Ehe fa éfuumeyiyaa fa nii úlafiyaalafi epuuk ya pakati Pútuun pa: niŋ úlafiyaa Pútuun pa te núutuulaa kilim etempo.

III Hítuulu kilim etempo keesiinane ka, hikina hiyem pálaŋi Pútuun pa. Apan kilim etempo kiyokananaat,

IV kaatuko an óo an aŋa Pútuun pa mpupuke naheekheek púlunta pa. Nuutaakaa iheeku eehe pínapii ti káyinan ka kutuunaa.

V Ayme ayina iheeku púlunta pa? Aŋa éeyinane ya lamma nii Yéesu ayem Añii ya ati Pútuun pa.

VI Yéesu Krista ánapiyoonap ti man ma miti pátise ya eteyoo niŋ ti hísim ha hiteyoo heeni-isee ha ti kuluwaa ya. Anápiyoot ti man lamma pale ti man niŋ hísim. Apan Kunuu ka keenape ka kíyisane nii eehuu páni kamma nkiyem tooña ya.

VII Ooto kéeyisane ka nii eehuu páni kayema pákahaaciil:

VIII Kunuu ka Keenape ka, man ma niŋ hísim ha; ántuŋ pákahaaciil paka payenke púloon kásiyoolaasiyool.

IX Núuyinanaayinan pakan keetantake, pale niŋ Pútuun pa púkupaa kiti eeha mpitantake ha, eeha mpusoke ha ihaŋa pafom, kaatuko tempo níhifulii, apan kiti Añii etempo mpúkupe.

X An óo an éeyinane ti Añii ya ati Pútuun pa, acoonaacoon ti yaanoo nii eeha Pútuun pa mpusoke ha, páni. Pale an óo an éeyinanut Pútuun pa, acokaacok po nincaama, kaatuko acoonut eeha Pútuun pa mpusoke ha kiti Añii etempo.

XI Ehe eeha Pútuun pa mpusoke ha: puwufanaawufan unaa elonj eepayantoo, apan elonj eyyuu uyya ti Añii etempo.

XII An óo an eetaake Añii ya ataakaataak elonj; an óo an eetaakut Añii ya ati Pútuun pa ataakut elonj.

Elonj ya eepayantoo ya

XIII Inci kiicaakiic enke aluu kéeyinane ka ti caacaw ca citi Añii ya ati Pútuun pa ancuk kati nímeysi nii nitaakaataak elonj ya eepayantoo ya.

XIV Ehe cíki eyya nuutaakaa ya hátikin Pútuun pa: ninj uluumaa waah ti pálafti etempo, éfipisi unaa.

XV Páawoo úmeysiyaameysi nii mpísisi unaa ninj uluumaa po, núumeysiya lombo nii utaakaataak eeha nuulumaa ha.

XVI An óo an eecuke anoo ti káyinan eeyem ti kaamuuyen enka étikitunkoo ti eket, añañaa kaluum, Pútuun pa mpuwufan oom an elonj. Inci oopa ti káakup kiti payenka kaamuuyen ka kiteyii étikutunkii ka ti eket. Taakaataak kaamuuyen enka nkútunk an ti eket. Inci neetaat ti hisoku kati niluum kiti kaamuuyen ka enkuu.

XVII Heenaput óo heenaput kaamuuyen, pale kaamuuyen óo kaamuuyen tom nkútunk an ti eket.

XVIII Uméysiyaameysi nii an óo an añja Pútuun pa mpupuke atowiyantoo ti kaamuuyen; kaatuko Añii ya ati Pútuun pa nafaasoo, ancuk Seetaani ya éteyini teyoo waah.

XIX Uméyiyaameyi nii unaa epuuk Pútuun pa, pale púlunta pa púloon umpa ti kayine ka kiti Seetaani ya.

XX Uméyiyaameyi lombo nii Añii ya ati Pútuun pa ákeyyookey naawufan unaa ecohato, ancuk kati úmeyiyaa Pútuun pa piti pánipani ya. Fiye unaa ukinaakin ti Pútuun pa kamma nuukinaa ti Añii etempo Yéesu Krista. Añii ya ayem Pútuun pa pánipani ya niŋ lombo eloŋ ya eepayantoo ya.

XXI Epuukam, nílaaŋ pínaati!

Kuloonaay
Karon: Kuloonaay (Portions)

copyright © 2018-2025 Wycliffe Bible Translators, Inc.

Language: Karon

Contributor: SIL International (in Africa)

All rights reserved.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

404e2c05-c6eb-5f56-8cae-50a5b595ef9a